

四庫全書

集部

欽定四庫全書

具茨詩集卷三

明 王立道 撰

歌行

題見山卷

有美人兮山之麓倚欽峯兮結茆屋乍看煙岫轉幽谿
時聽風泉出空谷澗樹垂垂飲野猿巖花寂寂眠山鹿
藝藥歸來半夕陽翠微當戶靜焚香著書不知歲月晚

春至徒驚薜荔長

壽鄉人

銀河耿耿秋雲涼
朱樓高下華燈光
流蘇零亂歌吹發
巴童起舞搖明璫
絲繩百壺瀉欲盡
嘉賓四座歡未央
遙看南極一星曙
主人起引紅玉觴
為言此觴誰致此
東華木公祈壽昌
金鞍翠蓋紛絡繹
芙蓉露滴雙鴛鴦

大梁行送陸白菴同年使周藩

大梁自昔稱中土
屹屹重城壯天府
險塞何須數峭谷

膏腴寧復論鄴杜城中日暮起歌鐘五千戶邑擅侯封
樊樓燈火晃清晝平臺車馬如游龍驅車走馬遙相索意
氣千金輕一諾貰酒春城百步喧呼鷹秋苑雙鷄落夷
門西望日蒼蒼修竹依然見故牆行人不解思公子父
老猶能說孝王孝王本出帝王家園池賓客盛豪華鄒
枚獻賦騁文藻勝詭進說生陰邪一朝漢法不相假斧
質隨來赤墀下旌旗無復兔苑遊蔓草鳴蟬自春夏吁
嗟盛衰各有時古人遺迹今人悲子長自是好竒士君

到梁園早寄詩

文衡山枯木竹石為汝湖學士題

衡山老人得竒趣坐向寒空寫枯樹孤峰嶸嶸虎豹蹲
修竹離離鳳凰翥鄧林從此失珍材碣石誰為徙天柱
吁嗟不獨模形似勁質清標更生氣槎枒不作斌媚姿
礪礪應無媿姍姍意憶昔山空藪澤深樵夫牧豎時窺侵
一朝點染入絹素始信志士相知心洛陽三月春可憐
黃鸝碧草同娟娟桃李花開玉樓曙梧桐枝拂金井寒

西風野外動秋色平蕪慘淡生蒼烟何如此石還此竹
古木千載俱依然吁嗟亦有王宰山水韋偃松苦心白
首徒為工

寶劍篇贈盧浚卿

我有寶劍光陸離云是干將歐冶之所為皎如芙蓉艷
朝日風胡一見嗟神竒霜鋒雪鏑未盡試三年玉匣寒
琉璃為君拂拭把贈君倚袖隱隱飛氤氲萬夫辟易走
雷電千里變化隨風雲為悲異物久淪棄聊從一擊收

餘勲

天柱篇贈徐子芳

天柱岵嶢與天通紫皇高住金銀宮下朝羣帝三十六
瓊甃翠羽驂飛龍廣樂絃縕赤霄暝烟霞爛熳迴仙蹤
九關無人熊虎靜赤鸞歛下隨長風長風喻馭江淮間
地靈天寶鍾英賢南州復見生孺子徐陵千載如比肩
憶君弱冠振芬藻琦才瑰行俱卓然俄摧月窟千尋幹
竦身忽在青冥烟青冥迢迢九萬里君行壯迹從茲始

逸氣遙橫七澤雲雄詞直簸三江水建安諸子空高名
王粲元非偉長倫中論年來篇幾著獨行已出今時人
我本金門陸沉者風期獨與君相親天生豪士須會合
龍劍雌雄信有神

送甘尚書兄還蜀

君不見蜀江之水東南流錦波碧浪涵千秋或通潤澤
散川澮或成壯觀橫中州煎腴填關禾黍美瞿塘汗漫
蛟龍愁丈夫出處亦如此畎畝豈即非良謀巫峯秀立

峨眉高君家兄弟皆時髦白屋幽棲處士里金魚光動
尚書袍况復叔子自奇士會看刷翩雲中翺秦羅少年
空有舌延壽絕域徒稱豪君來自西春正午君去應為
秋色苦寒風淅淅吹高林鴻鴈翩翩下長浦去影遲迴
冀朔雲離聲嘹唳江天雨蜀山迢迢吳水深吁嗟我亦
多同父

題許由棄瓢

箕山高兮千萬尋下有泉水清且深古來賢士多奇節

節踰高山泉比心玉食純衣九重位放勲未識先生志
一瓢猶自厭喧囂何況紘紘萬幾至九韶空令爰居悲
越持章甫將安歸當時牛口污萬乘此耳雖洗心猶非
深山蕨薇肥可食啜飲優游皆帝力鳥則有木魚有淵
我生何為獨偃側爍火難為日月光風雲煥赫龍虎藏
已知師錫有虞舜舍茲玄德徒皇皇人言身名有重輕
先生棄身如棄名縣虎附贅從決裂奄然千古同杳冥
千古雲山自朝暮至今遺家悲高樹秋風落葉聲蕭蕭

惟有寒蟬泣清露

擬漢京篇

峨峨萬雉環金城山河百二開漢京雲霧晴臨闔闔道
風雷曉動羽林兵九重佳氣鬱葱葱日光華萬國同
鳳輦行春過西苑龍樓問寢向南宮南宮西苑宸遊遍
茝若芙蓉新置殿待詔皆為帷幄臣承恩不復輿臺賤
萬戶千甍通狹邪朱門綺陌滿烟花五陵遊俠競借客
七貴侯王同起家起家氣勢何揮霍富貴皆由主恩澤

錦障遙從鄴杜歸金丸時向章臺落歸來鍾鼎羅高堂
意眇梁竇嗤金張蒼頭逡巡綠構窄翠蛾宛轉紅袖長
紅袖如雲正嬌妬世事迴看漸非故金谷樓臺生野烟
平泉荆棘迷芳樹魏其寧非肺腑親武安後來真逼人
華轂朱輪善傾跌諸君何必爭要津

壽陸用之父怡閒

陸子別我東還吳何以贈之三山圖扶桑半壁動晴色
滄溟萬里開蓬壺金銀樓闕紛照耀雲霧旌旗疑有無

仙宮老人冰雪膚浮丘雜坐洪崖俱行厨絡繹進綺食
開樽滿引紅醞醺頽然不知天地老桑田成海真須臾
君歸懸向高堂隅彷彿身往遊仙都綠髮朱顏迥相映
羽衣翠蓋交踟躕玉卮流津瑤草潤霓裳按節青鳥呼
吾知陸子百不需但覓綠服中庭趨青春滿眼胡不樂
高車駟馬誠區區

胡進士瓊林醉歸圖

三月皇州春正滿日出烟花祭紛綺白玉橋通仙掖斜

黃金閣向中天起誰張絹素為此圖雕鞍駿馬行甚都
似是南宮初宴罷春風颯沓光載途胡君馬上青雲客
嬋袖新袍漾深碧攬轡迴看上苑花揚鞭忽過南城陌
陌上垂楊拂錦鞦晴絲芳草搖春妍同行三百獨意氣
夾道人爭羨少年看君年少才復奇縱橫落筆無留思
朝來受詔日中上萬言慷慨真憂時丈夫立身良不易
多君已是圭璋器清廟明堂用豈徒蹉跎虛負平生志

朱翁夫人七十壽詩

七十年前占寶婺定知此夜下臨吳仙階日煖芝蘭秀
相府春明桃李敷四世一堂流澤遠三朝九命受恩俱
金貂入座皆嘉客珠履趨庭有賜奴內屋屏開紅翡翠
尚方錦製紫襜褕雲中青鸞傳新札海外蒼麟奉瑞圖
黃髮常同看綵服朱門真不讓瑤都

武夷行贈王石沙侍御按閩

使君驄馬雙紫纓繡衣晃晃初日明慨然別我向閩越
索我為歌武夷行武夷之山何嶽峯青巒赤嶂雙千尋

連峯迴合三十六翠玉尅畫芙蓉森我聞此中靈氣聚
往往羣仙下芝羽地脈似與三山通終南王屋那能伍
秦人初識武夷君漢世曾傳封禪文鸞車一去千巖暝
幔亭綵屋飛氤氲懸崖石室何年發坐視人寰意超越
明月時窺仙竈丹流霞常護靈函骨丹成骨蛻故依然
瑤草琅玕滿洞天樵客問津花落處山人得道鶴歸年
吁嗟名境豈常遇昔賢千載悲同趣謫仙天姥空夢遊
昌黎華嶽窮歸步我亦曾修飡玉方青城石髓誰能將

吹笙浪擬追吾祖執戟猶慙作漢郎羨君斯行真自得
而我猶憐阻南北何人還同賡棹歌頽然不辨滄洲色
瓶山先生廉察廣西作五嶺行奉贈

五嶺嶽崎亘天起梧桂雄蟠幾千里近聞黃雉阻越裳
行遣樓船下灘水天子念彼西南隅臨軒授節胡大夫
清秋月曉照旌榮繡衣迴光紫綬紆大夫欣然才且傑
勲名廿年振藩臬粵南此日更褰帷坐使皇威通絕徼
百蠻萬里並同風譜作歌傳樂府中會看旬宣績周雅

漢庭空說伏波功

擬漢將行

單于近獵天山東
長城火接甘泉紅
漢皇裂符徵武猛
羽林十萬皆從戎
甲光晃晃迎朝日
吳鉤楚練何輝赫
揮鞭直斷黃河流
積鞍遠蔽陰山雪
將軍新受九重知
隴西雁門交出師
魚麗畫結風雲陣
燕尾晴翻龍虎旗
寒沙颯颯塞草白
苦霧蒼蒼迷遠磧
帳下饗士日擊牛
軍中賈勇爭投石
少年本出五陵豪
死生意氣輕鴻毛

金鞍被就千金馬玳室橫裝七寶刀誇馬持刀時睥睨
一朝關塞烟塵起鞍後手懸冒頓頭囊間盡馘天驕耳
轉戰那知瀚海窮幕南已覺王庭空捷書朝奏明光殿
衛霍誰論頗牧功君不見冠軍意氣何揚揚輕車刀筆
徒自傷軍中流涕亦徒爾祁連古壘猶相望

鵲橋篇

今夕何夕明星光梧桐露下金井涼瓜果饗餌競羅設
持針曳縷庭中央云是天孫詣河鼓蘭房桂殿凝雲粧

天津水深不可涉，偃蹇烏鵲成飛梁。
金支翠辀恍明滅，隱隱玉珮鏘琳琅。
由來兒女齊拜祝，乞與巧慧能文章。
吾聞牛女皆列宿，武丁之說誠荒唐。
東西耿耿各照耀，云何此夕同徜徉。
精靈下上逐雲電，自有羽駕驂鸞凰。
盈盈一水若橫帶，倏忽超軼誰能妨。
况復析木自可度，豈必小鳥飛相將。
會乘長風凌倒景，直瞰雲漢求其詳。
古來傳言如虎市，姮娥奔月今安藏。
鵲媒娥女亦假設，陽臺雲雨同渺茫。
乃知世俗共誣惑，人間天上空相望。

大雨不寐聞蛙

長安一雨連日夜摧垣破簷水如射出門已見橫道波
田中何得猶餘稼秋來彌旬雨轉劇夜分不眠坐永夕
爾蛙胡為獨不仁囂囂與雨爭咆勃由來雨暘亦有時
么麼貪竊造化私

天空無雲日如火吞聲稿
骨應始知一有此二句

嚴陵獨釣

漢持太阿授新室炎光黯然光欲滅風塵傾洞天地昏
猘猱競食蒼氓血猗與光武起春陵司隸威儀耆老泣

昆陽一鼓虎豹奔罔魑解首櫓槍匿虹霓掃除日月開
赤精復吐山川色君臣會遇良有機乾坤整頓無倒傾
先生兀然獨坐釣羊裘蒙茸對空澤亦知天子即故人
不與四海俱臣妾翩翩長揖還富春狂奴不住公卿列
江流夜轉黿鼉寒山氣暝連風雨白吁嗟賢士各有志
相助豈必能相屈古來節義何代無西京諸子今猶烈
九鼎寧論漢家重一絲何止千鈞力畫圖彷彿清風生
盡濯貪頽洗頑骨

張翁暨豐孺人七十雙壽詩以祝之

城南老翁好文儒逃名山澤身常癯年來種秫足生事
躬耕況有萊婦俱芳春賓客時滿座白髮雙引紅醅醕
莫言龐公盡室隱令子舊直承明廬金章紫綬亦何意
為看綵服中庭趨

畫鯉魚

疾風橫驅萬里昏雲烟蕩薄海水渾神魚出波作人立
跋刺直上洪濤翻目光仰射天門赤大魚小魚俱辟易

東津已空鱸膾羣南溟忽失鯨鯢宅就中變化安可馴
頭角岬嶺鬚鬣真吁嗟乎葉公一去龍種絕三十六鱗
空入神

李節推乃祖衡嶽齋壽詩

衡南老人身姓李自說前生周柱史采藥長登紫蓋巔
結茆直向融峯裏羽衣玉杖獨脩然巖下時逢手一編
長生久已窺真訣翻使靈椿讓大年

張東涯七十雙壽

代作

大隱由來不出市君家住近湖東水河上谷神能自存
漢陰機心久已矣十年教子床頭書綵衣侍食垂銀魚
高堂偕老人所羨况是雙霑紫誥餘酒滿尊兮花滿枝
千春獻壽無休期

施心菊號詩

仙家近住城東陌種菊依稀五柳宅採藥名山去不還
花間空復留仙跡遺方入枕傳後人三折成名若有神
秋園寂寞多霜露相對時時淚滿巾

贈張司廳宣城人名乾號澄江

君家自昔擅華腴後來傑出多文儒往羨珥貂光七葉
今看甲第雄二都驄馬重行洛陽陌霜雪飄零舊臺栢
勲名繼美垂百年紛紛堂構昭遺迹

醫無閭行贈呂湛溪太僕

醫無閭其山乃在幽州之阻遼水之涯盤紆崕岫幾千
仞巋然上與北極通精光羲和望舒坐自詘麾使日月
東南驤憶昔康回怒傾地此山自有神靈屬至今天險

壓秦關河山百二誇幽冀聖王一出洗戈鋌草木光華
非昔年直使屯田通韎韐還看勒石擬燕然由來此地
育龍媒伏櫪駟倣才渥產盡慙稱汗血宛駒翻自
媿駑駘沙苑雲羣亘千里況有邊庭歲開市帝念誰為
景順儔特遣君行按東鄙嗟君裔本出非熊坐語能教
凡馬空王良已去伯樂死可憐騷衷嘶長風近傳樂府
歌天馬知君自是應圖者駿骨已見千金收肯使真龍
棄中野

題汪翁祿壽圖

老翁紫霓裳中烏何太古長耳雙方瞳炯然精英聚玄
鹿千歲放不騎靈木九節手自拄或時探籙向會稽還
見尋丹入岫嶁丹成依舊佳人間羽蓋芝旂往復還白
雲暮去洛陽市紫氣朝來函谷關我聞安期生亦有老
聃氏飄飄千載人此翁無乃是洗髓俄驚海水淺駐顏
恰喜桃花似洞天不解記春秋世人猶共論甲子小年
大年誰得知優游空負滄洲期茫茫河清竟難俟冥冥

劫燼胡不窺嗟余願得齋心長跼此翁側受翁素書習
服食後天常存遊八極

壽侯母

遥舉兮浮遊崑崙兮縣圃菊翩翩兮落英采叢蘭兮雜
芳杜駕黃鵠兮驂紫鸞傾芝蓋兮彌宇紛夕張兮瓊筵
酒盈缸兮如乳挹玉露兮飯青泥穀維何兮擘麟脯浮
夷兮為余鼓湘靈兮為余舞招安期兮揖浮丘觴王母
兮瑤之浦折若木兮遺余聊相期兮終古

壽錢氏 常熟近海居

鶴飛飛兮太清波湛湛兮晝平
翱遊兮遠望見老人兮
海之濱目炯炯兮方瞳容灼灼兮如英服靡靡兮霞矯
御清氣兮泠泠時三秋兮既屆肇初度兮芳辰采芷若
兮疏戶東蒨蘭兮成楹飯胡麻兮羞麟脯酌桂醕兮蕙
穀蒸介海若兮速駕輅木公兮來賓吹笙兮子晉鼓瑟
兮湘靈安期兮河上紛洗爵兮揚尊願公壽兮無極後
天地兮常存

滄海篇贈陸原仲

吁嗟乎青齊之土畫海為疆海之大兮吾不知其幾千
萬里東西南北之相望但見洪流巨浸渟滯蕩汨播元
氣而迴陰陽白日含光動碣石玄雲散影翳扶桑六鰲
燬骨三山渺茫金宮瑤殿不可覩惟有蜃樓龍室恍惚
開中央長鯨橫驅鱣鮪盡赤螭翠蚪紛騰驤裸身窮髮
一島萬里縈繫焉若阜垤之麗太行吁嗟乎海之大兮
涵穹蒼游波狂駭傾地軸天吳海若俱迷方吞江茹湖

日月翕張神怪躑躅潢汙混歲豈比夫臺駘河伯守細
流與勺水委瑣局踏徒惴汙於望洋我將東遊歷東極
乘濤鼓翼凌天梁天梁偃蹇不可涉蒼龍失馭中彷徨
道逢豪士東吳子飄然霞袂青霓裳廣頤豐下倚長劍
徒步直擬窺東皇探虛拊危意未息慷慨似恨河無航
愧余歸來不能將陸離劍佩空文章異時期子遊八荒
翩翩並跨丹鳳凰滄溟咫尺迴天翔

擬行路難

君不見轅下車太行咫尺愁崎嶇君不見韞上鷹雲霄
百里隨騫騰丈夫窮達在所遇高才猶自嘆遲暮漢庭
青紫常比肩子雲空獻長楊賦

君不見堂前燕翩翩冬去春來見君不見海上鷗紛紛
隨波飛復留丈夫亦有四方志十年辭親作遠遊客情
已似風花亂歸思空懸明月秋共道龍沙兵氣淨莫誇
燕領待封侯

苦熱行

六月徂暑暑未徂日車間關乘渴鳥凌空橫驅赤道紆
毒龍噓炎入幽都鬱蒸豈與南州殊芝蘭萎墮叢桂枯
天地翕翕如洪爐火雲輪菌光爍膚桃笙紈扇氣不蘇
冰盤磊砢疑有無行吟無心倚槁梧青袍逼窄坐自拘
騎馬出門漫跼蹐東遊蓬瀛覽方壺山高谷深倦取途
况邇聞多道暘夫我獨何意清涼須嗚呼安得飛廉奉
職屏翳趨頤使和風澍雨彌八區蒼生動地交歡呼

石屋辭三章為彭通府作

有美人兮山之阿佩陸離兮冠莪莪氣凌兮衡岱情馳
兮湘波結幽蘭兮延佇拊長劍兮寤歌蹊窈窕兮輪轍
稀木繁翳兮禽聲和黃牛兮白馬嵐光飛兮晴雨多余
何為兮茲獨往茲獨往兮將柰何

有美人兮山之陽芙蓉衣兮薜蘿裳憩夕駕兮蒙谷望
朝暉兮扶桑潺湲兮飛泉旖旎兮垂楊石巖岑兮嵌斫
峯巒矗兮翠蒼湖歙澗兮秋水碧洞幽閒兮春草香采
瑤花兮盈把宿石髓兮為糧訪隱淪兮絕澗想奇獨兮

高岡君一去兮獨遺邛欲往從兮江水長

有美人兮山之麓架辛楹兮結蕙屋被修逕兮蘭薰桂
空簷兮古木平田渺兮秋稼陰長林杳兮芳樹綠日坐
漁兮羣白鷗夜休耕兮飯黃犢倚空虛兮嗟索離望曉
巖兮聊躑躑躑躑兮何之招子真兮東谷願君兮歸來
蒼生兮極目

良木篇

君不見南山有杞梓北山有松柏仰看十仞渾無枝直

上參天數千尺橫柯偃蹇走蛇龍盤根詰屈層崖折畫
昏波濤虎豹驚夜撼星辰罔兩泣長風吹林百草萎豈
與榆柳同蕭索憶昔初成拱把時已抱鬱鬱千雲姿
蒿莽然蹊徑絕深山大壑多嶽崎天生異材久淪棄一
朝冥感君王知閭闔凌空九重起歛下明詔四出求工
師公輸持斤匠石走山神始獻中梁資乃知良木能用
大斫樗散樹空離披

賓子雨索壽鄉人七十三八月十月初度

琅琊山中隱者徒灌園織屨常自娛生身幸近南陽里
教子初遊閭闔都閭闔虹光九重起千官拜舞嵩聲裏
野人喜說漢衣冠何意偶同堯甲子甲子吾生不知數
頗憶于今四百四十五餘年願學華封人擊壤遙從祝
明主

釣臺行送姚掌教歸桐廬

漢家中更百六尺炎精無光羣盜劇猗嗟光武起春陵
司隸威儀重輝赫昆陽旗鼓豹奔猱猱隕首欖槍馘

桓桓諸將二十八馳乘風雲厲高翮先生爾時獨何為
羊裘蒙茸釣空澤神龍一奮海宇清冥鴻孤飛江霧白
亦知天子即故人偃蹇自擬長為客軒裳韋布各有徒
狂奴豈任三公責遂令意氣動星辰翻見功名勝竹帛
釣竒何如龍伯人漁國不似磻溪石千秋物色在山川
仰睇嵯峨俯空碧

菁菁麥

濃綠清陰高樹涼隴雲千里凝晴光鳴鳩飛飛麥苗秀

南國初來花吐香老翁持鋤刈新麥老婦牽機理殘織
新麥未可刈殘織何須理夜來縣吏急呼門此麥輸官
復餘幾賣布買穀半作秧那堪赤地連天長下戶無牛
身自墜翁婦相看愁斷腸

具茨詩集卷三

欽定四庫全書

具茨詩集卷四

明 王立道 撰

七言律

題張學士仰宸樓卷

仙閣崢嶸逼紫垣
蘭臺新賜出君恩
江光夜共青藜照
山翠晴當錦帙翻
盛事未論三萬軸
多書欲問五千言
碧山莫動焚魚興
紫誥黃麻寵正繁

贈北溪隱者

古藤修竹一溪陰
尋得柴關逕轉深
賣畚半將供鶴食
垂綸不着羨魚心
花憐清品閒常灌
詩喜新題病亦吟
老去故情終偃蹇
肯隨閭里學浮沈

詠淮南八公

霓車遙去白雲端
鷄犬紛紛隨羽翰
叢桂未須淹隱士
長裾元自笑王官
坐令楚國輕千乘
肯向秦關試一九
何事茂陵空好士
金莖寂寞露光寒

送人上陵

天上龍髯不可攀，獨看仙寢寄人間。
山川萬里開形勝，魂魄千秋自往還。
上食歲朝華省吏，迎神曉唱赤墀班。
春深雨露多悲感，一問松楸慰帝顏。

嘲王允寧失僕

戀主心微中路疑，掉頭忽去各天涯。
祇言舊馬能諳道，可信蒼鷹不受羈。
汲水尋源拋故侶，應門逢客結新知。
君才莫是慚蕭穎，回首空吟阿段詩。

送人下第歸荆溪

北上空嗟獻玉非，夢魂先繞故園飛。
長安晴日蒼龍闕，荆渚秋風白板扉。
紅樹漸隨岐路盡，黃花如伴遠遊歸。
多才莫訝無知己，且向江頭一振衣。

聞何喬仲侍御移疾野寺詩以訊之

戀主重來拂豸冠，尋僧還向竹林眠。
百年半是滄洲客，多病能安白骨禪。
閒指遠山孤枕外，細聽落葉一燈前。
何時更愜烟霞賞，同禮維摩結靜緣。

送吳王二太史陪祀諸陵

流水因山積翠分，衣冠人泣鼎湖濱。
暫攜劍珮辭青瑣，同向松楸拜白雲。
雪霽千峯明象衛，星垂五夜見龍文。

子長禹穴重探後，好藉雄才紀聖勲。

探一作尋

芳洲為袁御醫題和唐荆川韻二首

白鶴山頭綠樹村，祇餘猿鳥應柴門。
安期賣藥人常見，舍長傳書世所尊。
早向帝前辭赤紱，欲從方外學玄言。
平生自是無機械，野水春添助灌園。

紅塵滿陌非故村清禁夢迴猶鹿門蚤慕名山厭昏嫁
時逢好客命琴尊逃名賣藥不二價寄興含毫多五言
長此陸沈堪自老藏身何必於陵園

介翁見示誕孫志喜之作次韻三首

抱孫六十應非晚裁得新詩續舊歡寵埒金張開世胄
詞高屈宋比衙官賓筵勝擬金錢會宮禁榮分襁褓完
臺閣已傳韋氏業芝蘭頻向謝庭看

再世懸弧添麗藻九重賜果助新歡昂精遙應中台位

德聚俄占太史官手和酒醴情偏渥天與麒麟福最完
英物不須啼自識高門只在帝京看

自是相門多相種況逢清夜動清歡更誰好事宜風雅
憶爾前身定宰官雙蒂含珍爪脰遠九苞呈彩鳳毛完
瑤環瑜珥真堪慰他日雲初滿眼看

哭鄭碧河一首和歐強齋韻

七哀吟罷不堪聞零落深悲鵠鷺羣宦跡浮沈長隔世
交情生死獨憐君修文猶借螭頭管懸劍空餘谷口墳

魂去魂來何處是天涯日暮起愁雲

寄贈唐荆川二首

簪筆曾為漢署郎相如詞賦早升堂
自憐野性耽林臥恐著朝衣亂鳥行
溪上晴看黃鵠遠山中晚食綠萼香
多慚舊日滄江伴獨向金門立曉霜

知君骭髀與時疎不為功成學漢疏
垂釣溪連嚴子瀨躬耕人擬葛公廬
因窺導氣常隨鶴欲似全年更種樗
莫倚一丘能自老巨源昨有薦賢書

春盡懷故園

青春初動憶鄉園
春盡那堪思更繁
新竹從看侵薜荔
落花不分掩蘭蓀
林間一作臥鹿豕常求伴
溪晚漁樵數

過門莫恠曼容猶徇祿
十年簪紱戀君恩

長陵和王允寧韻

北極雄蟠第一峯
崔嵬陵闕俯高松
空林風雨歸千騎
向晚煙霞閱六龍
翠嶺屯雲蒸帝澤
蒼苔點石記仙蹤
艱難百戰興王地
無復秦關報夕烽

上已讌集

遊絲飛絮媚晴空
繡轂銀鞍逐曉風
綠野陰晴雙燕外
黃圖樓榭百花中
開筵共選流杯勝
懷古因誇說劍雄
帝里韶光須倍惜
尊前且莫嘆飄蓬

贈舅氏

舊存松菊半荒蕪

外大父
衡陽令

聲利蕭然白髮初
抱病著便

居士服好吟題遍
野僧廬里中送酒
襌田罷几上留書
相宅餘樗散笑余
真似舅得官猶自
愛閒居

送蘇幼清都諫歸養廣中

補袞應須濟世才
恩輝翻與照離杯
貪趨定省辭榮祿
敢為田園賦去來
諫草更編烏鳥疏
舞衣欲就芰荷裁
江雲嶺樹頻回首
隴使何時一寄梅

觀蘭亭修禊圖用上已韻

坐遵曲渚覽晴空
樽俎冠裳江左風
勝賞自超山水外
遺蹤猶指畫圖中
春看宇宙情俱遠
醉向文詞思更雄
陳迹祓除還比水
山陰亭榭幾蒿蓬

再贈唐荆川二首

厭看城市每移家，背郭園廬十里賒。
為覓漁竿仍種竹，恐妨瓜地罷栽花。
病煩送客攜孤艇，手校藏書過五車。
草就玄經誰與授，知君弟子有侯芭。

草深門徑往來稀，澤國風霜滿薜衣。
苦節喜為貧士詠，遺榮久食故山薇。
春邀田父看分社，夜對隣僧話息機。
却恠鷄冠尚在歲時聊，着戲庭闈

送陸白菴同年使周藩

錦帆江色靜芙蓉綵服翩翩紫誥重久為客居憐節換
況堪君別與秋逢才名天下知廷碩人物吳中數士龍
君到周南莫留滯彤扉瑣闥待從容

送徐槐溪

迢迢南陌望歸軒白馬青袍聖主恩共喜偉長來北海
何知司馬病文園佩聲遙憶趨青瑣春色愁看付綠尊
芳草長安門外滿王孫何日到長垣

送周進士使淮便省

長安三月共鳴珂又見輜軒向潞河
草色千村梅雨暗蟬聲兩岸麥風和
倚門正愜清秋望負弩重看故里過
聞道江淮多赤地憑君一問歲如何

曉日都門送客行燕山秦樹總關情
三春故國懸歸夢六月長淮下使旌
燕子飛飛山雨急稻花細細五風清
白雲南望堪回首非羨相如入蜀榮

桂翁九日邵園和韻

風景秋來滿習園登臨此日共金尊
黃花爛熳搖晴苑

錦樹參差照暮村
野鳥知迎仙閣旆
都人喜識相公軒
清時密勿多無事
合有新詩紀聖恩

名芳久說邵陵園
勝日還留北海尊
慷慨風情千古地
鬱蔥花霧萬家村
太行落照遙橫席
碣石流雲近拂軒
豈向平泉誇樂事
看垂彛鼎答宸恩

洛陽自昔盛名園
仙履同臨九日尊
花下樓臺開石谷
城中烟樹隔韋村
鉤簾亂竹低圍閣
解帶盤羅密映軒
銀燭金緋歸路晚
絲綸得暇聖君恩

託翁雨宿浣花草堂和韻二首

閣閣江雲拂地生
百花潭水月微明
乍看宿鳥驚枝墮
忽聽流泉倒檻鳴
人事天時無定迹
江湖廊廟獨關情
少陵寂寞遺篇在
翠篠紅蕖足雨聲

自羨茆堂得此生
璽書謾復下承明
擬將出處同龍臥
況有文章應鳳鳴
保傳正看今日事
詠懷終見古人情
禁河徙倚歸朝晚
想像溪橋流水聲

送孫毅齋學士赴南京

舊知中允藉聲名那復仙槎向石城
珥笏風雲天外靜
禁林日月海邊清
寵光不異登三島
辭賦終堪並兩京
前席名賢須有待
藜輝行動石渠明

未翁九日即事和韻

師道於今誰獨重
兩廡元老淑吾曹
乍緣藥餌違青瑣
喜見茱萸佩紫袍
秋色已深歸院靜
春風常在仰墻高
聖主正懷霖雨寄
肯容黃髮老蓬蒿

迎恩寺二首和韻

野寺尋春意最閒漫騎款段逐苔斑鳥聲似解添詩思
花氣偏能醒醉顏景入春來都有主地當勝處可無山
夕陽滿樹烟光亂歸路分明忘却還

燕臺吟望客情閒露葉烟花滿目斑日月東南時極目
風塵西北暫開顏芳園春盡惟流水遠岫雲來似故山
長路翩翩多去騎倦遊詞客幾時還

和玉谿學士齋夕有感韻二首

星壇窈窕開清禁霧篆氤氲徹上玄此日百神俱奉職

方春萬乘自祈年蓬瀛更羨天居近宣室還看帝席前
淺薄慚為香案吏齋心相對夜無眠

齋廬清夜儼相過宿鳥啾啾逗暝柯
玄殿正嚴春日祀青陽應陋漢時歌
星迴帝座瞻金節香滿仙階禮玉科
自愛相如能獻賦賦成無那鬢先皤

和齋夕詩又二首

仙署衣冠自儼然幽齋燈火坐思玄
星河永夜窺三殿禮樂明時際百年
散帙雪披春檻外焚香鶴引晚風前

宵長耿耿尤瞻戀天子親祠曉未眠

齋祓相攜玉署過槐庭雨露沐新柯憂農並仰春和詔
饗帝仍傳樂府歌制作百年誇聖代簪纓十載忝賢科
明君側席求頗牧為念馮郎髮未皤

和玉谿齋居對雪一首

千里浮雲漲碧空瑤花寂寂舞迴風詞臣欲賦羞梁苑
聖主方齋坐漢宮曉訝神光浮殿外夜聞仙語出帷中
即看帝澤和天澤玉粒逢年四海同

和齋夕有感

春半閒庭興杳然
况逢齋夕思偏玄
風烟漸度芳菲節
日月頻驚犬馬年
夜氣露清仙掌畔
天花雪落御爐前
瓊樓高處多寒在
聖主宵衣恍未眠

雲龍山寺獨眺次壁間韻

縈紆石磴望中開
故跡蒼茫半草萊
興廢祇今雙樹在
登臨自昔幾人來
僧攜野果修晨供
鳥啄山花上石臺
車馬紛紛千里道
河流長帶夕陽回

清明日獨坐感懷

清明南北異風烟柳色鶯聲又隔年客裡登臨情易倦
親前笑語夢常牽官閒且覓題詩伴祿薄翻資負郭田
強半春過成底事悠然獨酌望遙天

壬寅上巳黃少村宅中讌會余未入都癸卯補作

一首

風流誰似晉諸賢爛熳城南列楔筵何處更須尋曲水
君家元自傍清川春還芳草虛迷望客散飛花強鬪妍

却媿右軍無述作為君重記永和年

輓吳白樓尚書

已將舟楫濟明時更愛湖山早拂衣
百里風流思綠野兩朝功業付黃扉
閒憑獨鶴看碁局喜有羣鷗伴釣磯
何事忽騎箕尾去千林落葉帶寒暉

補作孫志高宅端午讌集詩

內殿初分角黍盤更開芳宴婪餘歡
已知仙侶招尋慣況復將軍禮數寬
荆楚歲時千古恨長安風土幾人看

自憐此日猶乖阻，獨向塵途歌考槃。

春盡書懷

官閒日日賦閒居，芳草年年伴草廬。
蔭葉不隨飛絮盡，鶯聲欲斷夕陽初。
虛簪畫省郎官筆，未就名山太史書。
踈懶自知來往少，蓬蒿滿徑不教鋤。

送春詩

閒將手板獨支頤，目送東風何處歸。
苑樹漸看春後密，庭花早覺雨前稀。
酒邊覽鏡憐華髮，馬上看山負翠微。

寂寂故園春易晚
蒼苔應遍舊漁磯

贈隱者

高車大蓋意已疎
鶻冠短褐墻東居
丹經鋪案晚食後
黃犢繫門春種餘
負薪野店與沽酒
學圃隣翁時乞蔬
愚公亦近北山住
為問險路今何如

張太醫六十壽詩

曳組聊隨青瑣班
未須峻嶒訪名山
市朝自昔容真隱
服食于今得大還
手煮神丹供帝所
家傳仙杏乞人間

莫嫌叔夜無仙分試覓刀圭學駐顏

送沈二槐改任惠州

相逢何事忽離羣千里銅符喜再分
鶴髮重看歸錦服鳳毛初見接青雲
雙槐舊望吳中起五馬新謠海外聞
更和淵明詩揔好知君家世自休文

鄭都官嘗作代秋扇詞予竊見其多怨尤不平之意
非知道者之言遂賦此以廣之非欲競工拙於聲律間也

明月悠悠掩素塵不將流落怨時人
千山雪滿龍蛇蟄一夜春歸草木新
雨後桔槔堪自廢祭餘芻狗向誰陳
應知物理同消息空為班姬賦損神

聞朱從龍下第詩以慰之

為爾臨風一愴神與誰同賞洛陽春
千金曾學屠龍技五上猶為黜額鱗
結綬遠憐青瑣客書空長念白頭親
會稽邑子應相薦莫厭窮途久負薪

得秋試消息後寄弟

靜閱賢書意轉疑
歎君年少不逢時
天涯空自看魚雁
春草常令寄夢思
三秋聚散風前葉
一著推移局裡棋
丹桂分明天上種
他年來折最高枝

題碧山

草堂遙傍翠微開
松竹陰森澗壑迴
偶悞一官辭白社
懸知三徑滿青苔
幽情未許簪纓累
浪迹從教猿鶴猜
他日功成不相負
移文且莫為君來

代作賀介谿生孫一首

湯餅重開今日燕詩篇猶記昔年歡慶餘每見鍾賢盾
喜極全勝得好官秋水精神應自別青雲頭角已先完
不因啼後知英物黃閣家聲奕世看

寄壽沈毅菴七十

晚叨一命即懸車華髮盈簪六十餘懶性不妨隨畎畝
閒身喜復伴樵漁獨尋洞壑探丹訣頻向兒孫問賜書
我亦舊知陽羨好買田應得近君居

王次川八十壽詩

解組閒身八十年
鵷冠鳩杖意仙仙
時凭野鶴看碁局
獨引江鷗過釣船
建業栽成彭澤柳
童烏解說子雲玄
空聞王子稱仙令
何似斑衣滿膝前

奉和數疇兄病起之作

雨過幽齋草樹鮮
書籤藥裏共年年
身名幸遣朝簪累
昏嫁還憂世網牽
散髮行吟春水曲
振衣獨立晚風前
自嫌客至常賒酒
特與空囊留百錢

十里清溪一釣竿
浮雲元未着情看
小營茆宇方蝸國

暫解朝衣稱鶡冠
賦芋養狙還自笑
呼牛應馬任相干
虛船不解逢人怒
搔首春風午夢殘

奉和數疇兄對酒自嘆之作

為通花徑數誅茅
長日炎氛靜裡消
秋動遠林催絡緯
月和清露上芭蕉
濯纓慣坐溪邊石
覓句時行湖上橋
莫向天池羞斥鷃
蓬蒿九萬各逍遙

憶騎竹馬逐諸兒
忽道行年四十踰
謀食一身長畎畝
起家三世總文儒
青山對酒從吾好
華轂傾人笑自驅

世路只今多險塞與君試學北山愚

時序驚心又素秋此心應得幾宜休微官出入莊生蝶
散帙縱橫王子籌物累祗餘琴鶴在道心唯共水雲謀
年來苦熱緣多病又向山中半月留

數疇兄以病阻看花之約作詩見遺次韻答之

經時臥病覺春纔猶喜名花遲爾開好客暫虛文舉座
新詩先覩馬卿才漸驚落絮侵碁局故引游絲罥酒杯
我亦文園同病侶更留述作待君來

爛熳芳園此日纔春風小徑為君開一枝早占傾城色
四韻空慚倚馬才野外不妨頻縱棹病餘應喜數飛杯
劉郎舊是多情者可待名花落盡來

春深饒睡夢迴纔接得詩筒枕上開莫訝相如非病客
須知太白是仙才洛陽更長名園價金谷空餘罰酒杯
點綴春光應不惜一花乞與一詩來

秋日再過顧氏清溪別業因和洞陽韻

秋水蘼葭思不禁扁舟重繫此溪陰犢眠疎草猶迷徑

鶴哺新松欲滿林采藥常嫌驚鹿跡山中初服野人心
舊來漁父多相笑一別江湖霜鬢侵

泛湖遊漆塘諸山再次前韻

湖上秋風病未禁興來真欲到山陰漁蓑亂結汀洲草
樵徑香分橘柚林遠谷采薇隨鹿跡閒巖投果見猿心
放歌未盡空迴棹落日增波憂思侵

追送陳澄江用章水東韻

兩月相逢已隔年翩翩征袂忽離筵青春劍珮明秦嶺

細雨桑麻繞涑川莫恨一麾猶出守須知五馬亦戢然
傳巖今日經行處更訪當年版築賢

爐省追陪憶往年留連何必對芳筵封陳亦自須蒲阪
借冠還宜念潁川故國春光難忘却清燈心事共犁然
使君異政屏風在況有當時能薦賢

題龍江

江橋一別思如何楚水燕山歲月多雲霧只疑龍化去
夢魂常逐雁來過江妃夜出收遺珮海估春經惜逝波

好似當時題柱客浮雲空負采菱歌

萬梅菴詩

菴在震澤之濱羣岫中

結廬不托桃李場羅浮村畔孤山陽疎窓影落一枝瘦
虛室風吹千斛香烟壑霏霏來暝色湖波渺渺動晴光
江南應得春意早折寄無妨驛路長

元夕憶諸弟和沈原約韻

燈火樓臺皓魄圓客心何事憶當年鵲鴿飛處情多緒
鴻雁來時書幾傳春夜月如秋夜冷燕山雲與越山連

誰家更奏思歸曲無奈愁腸萬丈牽

秋日郊行

冀北初秋暑盡消無端風雨木蕭蕭
野農罷餉還傾笠賈客愁寒半挾貂
雁礙浮雲時緩度草迎微露更先凋
何人四望躊躇立多病應無辱聖朝

九日同序翁邵園賞菊赴李蒲汀之約用舊韻

幾年聞說邵家園今日黃花對綠尊
水閣山亭斜肖郭柳蹊松塢曲成村
登高直倚林梢檻向夕仍開竹外軒

莫謂絲綸有餘暇
太平簫鼓藉君恩

和與新見贈韻一首

高閣層軒野水西
白雲長此護幽棲
買田祇為開三徑
時藥還須滿百畦
春去林中花自發
客來竹下鳥先啼
夜遊何事頻攜燭
明月紛紛隨杖藜

夏夜同唐應德王道思尋顧與新清溪別業主人
追至設燕

扶疎嘉樹蔭清流
卜築曾聞顧虎頭
乘興不須題鳳字

逃空聊復上漁舟，忽逢名勝尊前集。
好伴沈冥物外遊，湖上秋風芳杜晚。
月明相憶仲宣樓。

謁于肅愍墓祠

整頓乾坤事已休，冥心東市更何求。
亦知聖主能憐舊，無那書生欲拜侯。
一木空悲支大厦，兩旗猶見度中流。
岳祠相望湖南北，長共忠魂地下游。

送鄒學士赴南京

搖山仙館接瀛洲，稷下名儒早見收。
玉笋暫隨鸛鷺入，

金陵重憶鳳凰遊傳經鶴禁恩猶渥問道鸞湖意始酬
莫愛江山久留滯佇看明主待謀猷

送鴻山殿讀歸省

珥彤幾歲共仙廬羨子承恩下玉除春晝正宜新賜服
山房更檢舊藏書夢迴北闕陳情後歌倚南山獻壽初
我亦高堂凝望久不堪千里獨離居

長至日憶諸弟

冬至陽生春欲回天涯節序思難裁自憐北地常逢雁

為望南雲獨上臺玄草已甘吾寂寞綵衣須共爾徘徊
去年此日還相憶攜手前溪問野梅

憶昔吟贈華鴻泉之金陵

憶昔秦淮橋上遊綠槐垂穗正宜秋燕飛不記烏衣巷
水滿微分白鷺洲北闕晴雲常冉冉東山斜日自悠悠
風流誰是今安石惆悵蒼生獨倚樓

孟冬陳戚畹第會同年有述

甲第晨開簇錦鞍同時休沐帝恩寬形容不改登科舊

樽俎還追錫宴歡漫擬新詩賡伐木相逢明世喜彈冠
招尋豈為酬良月應共芳情保歲寒

詠紫薇花

紫薇開處覓蓬瀛深院層軒拂曉晴絢爛只疑春色在
歲隄偏傍日華明絲綸閣下人誰伴虛白堂中韻未成
祇恐秋風不相假緩吟深酌對寒更

元日試筆

閭闔東風送舊符氤氲佳氣繞皇都金吾千仗如雲擁

玉佩同聲向曉趨春令已從今日布物華應與去年殊
侍臣下直明光殿紫禁傳宣又賜酺

花朝感興

疎雨輕風濕曉烟曲江春色倍堪憐新蒲細柳行宮裏
語燕啼鶯御道邊擬向尊前銷客思更於花下惜芳年
明時事業非無賴揚子何為獨草玄

院中紅杏

天公何意屬青陽留却繁紅殿衆芳仙圃豈應須鼓發

溜林時復見琴張朱欄露重歌晴錦翠箔風微浥晚香
羨爾倚雲真得地野花空自落東墻

鄭泰陵詩

千林松檜鬱相迴永夜風生瀚海哀萬國昔曾瞻氣象
五雲空復護崔嵬古來鳳鳥長難至天上龍髯定不回
苦憶焚香賜第日報恩真媿濟時才

至日長陵陪祀

長陵西接黃花鎮白雪蒼岩夜色遙陰殿袞龍猶在目

往時松栢已干霄，總聞一怒風塵起。
想見千官遷次朝，悵極兩京興廢事。
小山何意起漁樵。

題文巖畫端

遠山近山澹空翠，天風迢迢吹薜荔。
溪邊野橋石亂倚，林扉晝扃花滿地。
主人獨歸如有遲，黃精飽飯松醪醉。
山深不解名與利，練袍芒鞋了生事。

西苑春晴

二月韶光滿帝城，上林啼鳥報新晴。
依空裊裊游絲靜。

極望萋萋芳草平風煖昭陽翻翡翠波融太液浴鵲
迴看夾路花齊發應待鑾輿向此行

宮柳

占盡芳菲春暮天昭陽柳色倍堪憐千條曉濕金莖露
幾樹晴低青瑣烟暗葉藏鶯嬌自語飛花蹴燕舞還顛
宸遊到處成歡賞又見朝來三起眠

擬聖駕祀陵畢奉聖母汎舟西湖應制

鳳輦逶迤環紫極春明雨露動宸思遍修祖祀橋山冢

更侍慈顏太液池
原陵迴望衣冠道
汾水空慚簫鼓辭
神聖於今兼順孝
相如欲賦苦才遲

聞雁

漏轉更深月滿樓
雁飛遠送一聲秋
聯翩曉起芙蓉苑
三五寒迷蘆荻洲
古塞離雲常漠漠
空山落木共悠悠
瀟湘自是饒梁稻
應為隨陽向帝州

午日駕幸西苑侍游有述

薰風澹蕩上陽樓
西望昆明積雨收
艾葉菖花迎鳳輦

蘭橈桂槳過龍舟當年虛羨明良會此日恭陪伴侶游
帝德如天時正午微臣何以頌鴻休

戲陸節之

早聞通籍金閨裏謝病還攜舊金紫行年七十苦好吟
滿卷新詩放翁似洞房鼓瑟奴婢歌秋月春鐙歡更多
自羨名園常負郭不須塵陌逐鳴珂

扁舟暝逐使君行已是歸帆一月程恩詔多慚優淺薄
風期獨喜托才英江迴故國春迎棹星聚清尊夜倚瓊


我亦天涯同病客
翻憐司馬滯江城

咏懷

路難詞客幾時還
坐對荆扉手自關
深樹鳥鳴春寂寂
空墻花落曉班班
兩都獻賦慚新寵
五老藏書憶舊山

關

子雲莫自惜才慳



具茨詩集卷四

欽定四庫全書

集部

具茨詩集卷五

詳校官庶吉士

臣柳邁祖

中書臣劉源溥覆勘

總校官進士

臣繆琪

校對官學正

臣蔡必昌

謄錄監生

臣劉璿

欽定四庫全書

具茨詩集卷五

明 王立道 撰

五言絕句

春雨二首

館試

霏微初洒潤霖霖自知時上林千萬樹樹樹有新枝
滄海來天際津津溜苑牆還騰百川水一雨遍遐荒

郊原春望二首

館試

行行窮遠陌冉冉度香車未就王孫飲聊看田父鋤
鶯啼燕樹合水漫渚蒲新春歸不須恨化域自常春

詹司訓守貞義訓卷

早慕共姜節還誇孟母賢爾來授經處應蓼莪篇

詠園中雜花

葵

臥病違朝謁依然向日心不見清溪上葵花一院深

罌粟

野人懸磬室那得粟千罌且共寒芳實無須惜落英

雞冠

迎風如欲鬪徹曙不知啼舊得尸卿術栽花總似雞

蝴蝶

本來百蟲身墮入諸花趣有情與無情常愛中園住

金錢

山人賣卜歸滿砌正芳菲不堪懸竹杖留取市荷衣

薔薇

密葢與繁枝參差間竹扉紅芳雖自媚綠刺罥人衣

翦春羅

昔聞綵作花花却春羅似欲覓翦刀痕盡付東風裏

石竹

丰茸鬬春色枝葉何娟娟弱質難棲鳳從教香麝眠

玉簪

擢穎疑瑤華攀條亂素手酣歌不自聊助予一搔首

秋園金氣應含素向欄干莫作朝簪比唯宜戴籜冠

長春

長伴百花開不共百花老
悞却送春詩只疑春正好
碧樹攀欲盡黃鳥啼正歇
一花復一花常如二三月

白芙蓉

抱質宜素秋開花如白槿
對爾好玄談何郎新傳粉

詠園中雜草

蘭

清芬愜幽抱手自植中林
不須滋九畹聊此對同心

萱

芳叢雜芝蕙稱此北堂幽為園自可樂那必爾忘憂

書帶

地慚揚子宅草似鄭公鄉書卷年來廢空翻白日長

繡墩

百花春色裡一徑鳥聲中偏稱遊人生壺觴誰與同

千年運

朝菌無晦朔此草自千年萬物枯榮理凭欄一慨然

菖蒲

托根長水石正與幽人宜更看成九節服食比華芝

鳳尾竹

紫文何歲蕤采采露華滋不向高岡上常依白石墀
寂寞含清露歲歲蔭紫苔尾長無羽翼不得上仙臺

詠菊

梅花菊

彭澤高人里孤山處士家清明迥相映草樹亦交花

萬卷書

生涯萬卷書何似營農圃散帙向晴簷中有諸花譜

御袍黃

霜黃上林草天子欲更衣六宮齊望幸紅紫漫成圍

金盞銀臺

常年老瓦盆珍重花神意白衣人不來對爾聊成醉

蜂房

秋香初破蓋遊蜂日來往還愁蝴蝶競結窠花枝上

鷺毛菊

弱羽綴芳枝離褊傍水涯欲識此花品唯應逸少知

樓子紅

天工潛結構朶朶疊紅英為是登高助偏宜樓子名

粉西施

那得東籬下忽逢浣紗女清露濕鉛華捧心寂無語

僧衣褐

遠師不染性持此遺陶公三徑雖云好了知色是空

雙飛燕

花得同心媚，羞池雙燕飛。應多戀主意，社後自忘歸。

蛙聲

上林故多蛙，爾聲何喧闐。忽感自得意，寫之觀物篇。

題四老圖

四老不知姓，相逢各問年。山深無甲子，黃髮故依然。

題何蘭幽谷卷代

未能游汗漫，聊自托空虛。嘆息紫芝老，寥寥千載餘。

澹菴詩

浮雲看世事如水見交情此道令人棄悠然想太羹

題方塘

儵忽何年來鑿此混沌竅誰知方寸間雲水常相照

走筆柬數疇

几上五千文幽棲似鹿門春光看欲盡董相試窺園

南湖畊雨

武陵六景為陳節推題

遠近春鳩鳴一村競田事老人抱甕來滑滑亦何意

河汭漁梁

窮鱗赴激湍漁子爭夜漁何時更拊手濠上觀儵魚

西山烟寺

山空萬籟寂鐘響時出林欲尋定僧語烟蘿交翠岑

桃溪晴月

迴沿月明中溪花夾長鏡相逢溪上翁掉頭不言姓

竹灣雪艇

風雪渡頭緊孤城欲暮天去來總自得知是子猷船

金霞夕照

千峯如散綺夕陽在山半
中人欲歸適意忘景晏

贈青鳥家

客持一卷書乾坤吐玄秘
由來識者稀獨立寒山翠

偶成

故園千里外獨有夢魂過
何時更攜手散髮共行歌

采蓮曲

八首

采蓮折却藕藕折絲不絕
迴船向中流綰作同心結

斜睇向芙蓉迴身鼓蘭楫莫待暮潮生宛轉紅粧濕
采蓮莫采花花盡乃成子八月白露寒悵望秋水
采蓮復采蓮蓮葉青田田舟輕風蕩漾拋失露珠圓
停橈采蓮花花開半花落淥水日夜波紅芳詎如昨
去覺橫塘近來驚初路遙因聽竹枝曲倒把木蘭橈
荷葉不任裁藕絲不任縫相呼早出浦遊子怕窺儂
鳧鷖滿中流試數雙與匹賭失碧玉簪歸家不敢說

七言絕句

畫百花

春光盡向筆端迴萬紫千紅次第開
河陽滿縣真如錦却恨潘郎歸去來

一自燕支屬漢家上林花草倍繁華
却愁顏色隨春盡剪取枝頭一片霞

又治徵卷

代作

海北湖南萬里程去思時復頌番君
弦歌豈為營三徑却望虞山多白雲

九月二日侍經筵有述

露華仙掌入三秋
翠幄重開拜冕旒
稱制諸儒真陋漢
乞言尚父未論周

和唐應德紅梅詩五首

嬌唇點就誰相顧
獨立東風漫自愁
安得昭陽借君寵
同時鉛粉盡含羞

京國春生富貴家
美人裁錦貼新花
若教置向金壺裡
一派寒江幾點霞

主人舊是謫仙家常捲簾帷入綺霞為問韓郎染根手
何如能染樹頭花

鄉園入夢思模糊京國相逢識得無玉貌訝從今日改
清標只似向來臞

羅浮一別已如夢新向燕支山下來聞道主人重華色
笑顏不惜為君開

送蔣醫歸江陰

遠向金門欲獻方暫因采藥去江鄉開徑我須從蔣詡

避名君莫似韓康

送呂別駕還毘陵二首

綠樹清江曉漲平
春帆遙指六龍城
吳中父老相迎問
為說新寬百萬征

東南民力近如何
日見雲帆轉北河
課上不須論殿最
由來良吏拙催科

釣臺吟送人之桐廬

洛陽爭覩漢官儀
獨著羊裘理釣絲
莫道狂奴猶故態

富春山水是相知

高臺巖嶂俯江湍
古木蒼厓清晝寒
千載山川猶物色
當時諸將枉登壇

赤符久已定長安
只合歸來把釣竿
後人不讀樊英傳
肯信人間行路難

南巡歌八首次韻

丙夜天門金鎖開
珠旂葆羽拂仙臺
橐鞬躍馬新都護
夾轂前驅萬乘來

千騎如雲駐楚坡
楚人從此解燕歌
諸君莫作思歸調
指日鑾輿復渡河

楚江西自岷山來
春日荆門烟樹開
千載襄陽多古跡
君王欲一望強臺

錦字親裁龍鳳旂
羽林對對拱宸旒
楚人浪擬相如賦
天子元非雲夢遊

雲車清夜度千門
雷鼓轟轟河漢翻
帝座暫臨南楚分
前星正照太微垣

蒼梧雲深悲帝心
龍旗春向湘江潯
太史由來知聖孝
虞人何事獻官箴

南陽舊是帝王家
西入長安望已賒
春風乍到龍飛殿
羽扇紛紛引翠華

天臨北極鬱崔嵬
玉帛年年萬國來
君王二月南巡狩
春水朝宗江漢迴

彰義關候駕十首

遙望西山紫氣生
月華天際更分明
旌旂歷歷穿雲樹

天子歸來白玉京

候蹕宵驅彰義關古橋無復水潺湲人家兩岸春楊裡
舊是桑乾第幾灣

年來章奏滿公車總道遐方困未舒君王一出憐民隱
扶杖山東聽詔書

玉戚金戈壯國容每當三五候飛龍月中真得持盈意
常見光華護九重

南北河山共一家瓊丘仙圃自繁華上陽更有餘春在

紅藥叢叢初放花

燕山明月照盧溝
笳吹喧喧水急流
行人盡唱千秋曲
一夜歡聲達帝州

朱衣對仗曉追班
帝在清都虎豹關
鐘鼓正傳宮漏徹
侍臣端笏拜天顏

燈火城西幾萬家
仗來馳道滿烟霞
須臾拜舞千官合
寶炬光中駐翠華

鳳詔初傳自九天
賜租重見漢文年
燕南楚北經行地

雨露君王本不偏

九天晴日六龍迴
綉陌春風錦障開
乍聽轆轤香車遠
又見紛紛後騎催

王子裕百花圖

路迷誰識武陵源
往事空悲金谷園
愛爾丹青偏入格
須知苑李本無言

翦綵隋宮事已非
猶餘粉黛貌芳菲
莫教展向金屏裡
睡蝶游蜂盡欲飛

傳道昭君昨入胡後宮留得美人圖紅粧翠袖分相向
只恐君王悞一呼

八月秋高白露寒浣花溪裡倍堪歎莫道紅顏多薄命
寫真猶入畫圖看

老將行贈孫伯泉都督

射策當年第一人秋風感歎二毛新羽書昨夜甘泉道

知爾封侯骨相真

君武舉
第一人

早從卻縠問詩書廿載勲名寄直廬敢謂漢庭方貴少

試看腰下紫金魚

投筆還將注豹韜
報恩寧復戀旌旄
五陵舊職來相訊
指點秋空太白高

百萬兵中擊柝聲
綺裘繡帽入承明
霸亭醉尉休相問

帝遣將軍特夜行

君所領即漢所謂
北軍衛宮掖者

燈下酣歌擊唾壺
匣中龍劍夜噫嗚
太平不用黃公畧
閒與兒孫說陣圖

直下金門帶劍行
蕃酋夷使盡遙驚
將軍莫是今方叔

私向傍人問姓名

定遠思歸限玉關何如出入紫霄間
緩帶輕裘修羽獵
時時射虎向南山

穿楊才藝本天成
援臂曾傳飛將名
自託年來偏矍鑠
彎弧躍馬萬人傾

將軍忠孝舊儒家
憂國論兵兩鬢華
大樹無言鈴閣靜

笑看燕子逐飛花

君忠烈公
之伯子

休沐閒庭滿綠蕪
丹青聊自靜中娛
少陵詩句余真媿

戲博將軍畫馬圖

君雅善丹青余
蓋欲有請也

送陳沂赴南京衛幕

水落寒江送客舟，雁聲雲影共悠悠。
晉陵風物今何似，須信相如故倦遊。

京國逢君未幾霜，愁看歸袂拂離觴。
秦淮此去三千里，流入荆溪即故鄉。

金陵幕府靜魚符，列戟常閑百萬夫。
莫謂太平渾忘武，國家根本壯先圖。

清秋欲盡送將歸路遶銅門失翠微楊柳不堪搖落後
伴人殘菊尚依依

三載曾趨青瑣班春風時憶舞衣斑雁飛江浦寒烟斷
彷彿舟移見舊山

惠山泉品逼中泠陽羨仍留楚頌亭種橘煮茶應不俗
懶看蹤跡逐浮萍

送鄭翁還廣

燕山雨雪一冬足越嶠烟花三月多綵鷁忽隨春岸遠

東風斜日水增波

鳳詔新霑天北闕
驪駒遙駕海南邦
濃花細草催行色
一夜春帆過曲江

玉窖溪連海色新
羅浮山下別開春
南還更盡登臨興
莫遣清江空白蘋

城頭雲向南飛遠
城下車從北發遲
日暮紅塵千里隔
曉星寒雨不勝思

壽嵇川南母

春暖瑤池花草香
金魚珠履儼成行
一盃沆瀣千年祝
此夕為歡殊未央

翠檻紅樓拂曙開
瓊芝瑤蕊映金杯
方平遙向麻姑語
碧海揚塵今幾迴

北堂清晝藹春暉
歌繞雕梁燕却飛
自有神仙攜鳳吹
不須令子舞萊衣

二月蟠桃亦放花
花枝爛熳赤城霞
逡巡已結千年實
更覓安期棗似瓜

誰贈君家縣圃圖
紫烟白鶴列仙都
江妃鼓瑟湘娥舞
識得中間王母無

庭前裊裊長春羅
堂上歌鐘伴綺羅
聞說東鄰有好事
金鞍銀燭夜深過

有穀堂

甲第新成高入雲
風流廿載憶徵君
亭亭獨鶴閒芳草
惟有詩書日夕聞

陶令歸來看五柳
魏公老去有三槐
朱輪翠蓋交生蔭

須信當年不妄栽

夏夜崇雲壇陪祀

中天星斗淨瑤壇夾陛旌旗四月寒
百辟自隨千仗下六龍猶在五雲端

城南擊柝夜如何清蹕初傳萬乘過
輦道逶迤多暝色故開宮扇望星河

野樹蒼蒼散夕暉天門西望翠華飛
微臣未解風雲樂獨咏皇恩泛馬歸

雙闕遙瞻龍虎旗金根羽蓋自葳蕤君王不遣先除道
霑洒分明待雨師

日轂雷行過紫都蚩尤太一總先驅聖世百神能受職
雨師何事尚天誅

君王此日禱桑林萬井沉沉羽衛森玉檢泥封多秘祝
祠官偏識愛民心

龍見修雲古有名君王親出為蒼生爐烟已結氤氲氣
雨足森森散鳳城

王母歌

漢宮初起集靈臺
絳節飄飄羽扇迴
雲錦書傳青鳥信
遙看阿母自西來

芳春花草滿瑤池
忽憶麻姑海上期
欲問蓬萊水深淺
因風遙寄萬年枝

瑤島分明近日邊
周王元未解求仙
八駿崎嶇雲外路
空疑道里隔山川

雲母屏前吹玉笙
侍兒猶識董雙成
笑余學隱金門客

太似當年方朔生

昨夜重遊汗漫歸依然戴勝髮如絲三千年一校仙籍
迴指彭聃是小兒

玉洞桃花引去津鶴聲猶似隔紅塵自嫌王烈無仙分
乞得素書翻與人

三月晦日出郊游衍偶誦唐人詩三月正當三十
日因用為起

三月正當三十日又騎款段出城南欲賦送春詩未得

柳溪花徑遍相探

三月正當三十日夕陽欲盡亂啼鳩榆錢鋪地應無數
買得春光幾許留

三月正當三十日把酒題詩興不慳汀洲芳草不歸去
留得春光總是閒

三月正當三十日鶯聲如倦復如愁綠楊拂地花成雪
斷送春風也白頭

三月正當三十日餘春零落入風塵閒過歲月不知老

失却鶯花轉覺貧

三月正當三十日一春又向客中過
薜蘿已負滄洲約
騷囊空憐白玉珂

三月正當三十日落花寂寂對閒門
莫言春盡渾無事
分菊移葵事更繁

南村漫題

綠野風烟入望頻
柳溪松塢別藏春
莫言未識南村路
逢着桃花試問津

題梅

獨樹離奇帶雪看，小窻應絕勝江干。
竹床紙帳成幽伴，冷蕊疎枝幾歲寒。

聞人氏五十壽詩

生年半百混樵漁，教子還看上石渠。
欲舞絳衣應未得，却憑丹鳳早銜書。

青山盡日獨支頤，白首猶堪一卷師。
八十年來閒擊壤，兒童齊和紫芝詞。

詠閣中芍藥

宣皇時移植

繚繞朱欄倚日邊
歲粧紅藥露華鮮
蓬瀛本自多奇卉
況爾栽培更有年

瓊幹舊分天上種
瑤葩偏向夏初開
侍臣草罷明光詔
獨傍清陰過碧苔

題惜花美人圖

滿苑芳菲映曉粧
折將春色媚高堂
一聲啼鳥且歸去
祇恐清露沾衣裳

三窮圖為周弓岡中丞題

妾心何事九秋霜肯為輕塵弱草傷死可復生生不媿

悠悠千載兩共姜

青年守節

忍死元非愛一身百年兩世此遺娠手縫襁褓和殘淚

抱向高堂回首頻

遺腹傳芳

鷓鴣新成試羽翰芳枝何意發枯蘭相看未語先成泣

人間真有立孤難

孤兒發科

昔時無子今有孫含飴魚復助晨昏庭萱含露春風滿

三十年來貞孝門

四世承惟

夜行武林山中贈老僧

一盞清燈一榻塵山深狐鬼共為隣年來伎倆看都盡
遮莫山精巧試人

昨夜山前說法歸毒龍馴虎總忘機客來相訊還相笑
鼠啣床頭故褐衣

題劉氏雪竹圖

蚤聞楊氏傳清白千載君家更紹芳庭竹蕭蕭帶殘雪

粵南應為比甘棠

壽琴泉宗長六十

七尺焦桐一脉泉高情妙契已多年
此泉直遣作春酒百歲陪君調素弦

寄高大用

故人忽漫入長安匹馬青裘霜雪寒
尊酒未空還別去河橋相望斗闌干

十年遙憶洛陽春春色空隨千里塵
應為未逢楊得意

相如不是異時人

徐雷溪掌羅山教

初隨計吏入秦關
暫假君恩曳組還
泮水平橋春雨後
藏書猶憶敬亭山

千里長淮古豫州
離離遠樹接芳洲
偉長一去憐王粲
明月何人共倚樓

送鄒均敷

清秋欲盡促歸心
海日蒼蒼曉隔林
回首長安應未遠

蓬萊宮闕五雲深

壽詩

攝衣欲上萬言書
忽憶高堂獨倚閭
十月江南春已應
倦遊應不似相如

送周嘉遇之景陵

燕山楚澤共微茫
細雨春帆度漢陽
好向鱸堂理吟卷
竟陵東渚即滄浪

送陸奎之嶧縣

洙泗迴縈入古城宮牆猶是魯諸生聖朝禮樂超千載
莫似當時不肯行

題石溪

磊磊白石清溪深柳花漫天晴復陰扁舟罷釣自來去
無人更識滄洲心

春閨

少婦看花淚滿裳盈盈終日不成粧裁得春衣無用處
書來猶說在遼陽

送倪德符知郴州

楚南山水更多奇
五馬春深度嶺遲
問俗已窮千里目
興來應不廢吟詩

郴民今日總魁奇
可信昌黎愛廖師
更有濂溪能化俗
郡中為訪種蓮池

春日雜興

綺閣瑤臺迥碧空
春光盡在上林中
瓊華島上薔薇雨
太液池頭楊柳風

春色城南更可憐
賣花種柳各紛然
半酣落日慵騎馬
獨整危襟坐水邊

滿院花開錦作叢
短牆一角漏春風
院門深鎖閒亭晚
惟有鶯啼綠樹中

草蔓荒堦白日陰
亭亭塔影臥空林
山僧不慣迎遊客
自對諸天誦梵音

樓臺白日靜芳林
一逕蒼苔春樹陰
獨坐無心看舞鶴
石床移處落花深

吳雲越樹夢中看
曉起西窗月色寒
此恨春風難解釋
飛花無數墮闌干

野亭流水有餘清
新雨浮萍一夜生
竟日獨吟還獨酌
故園花鳥不勝情

海棠開遍已春深
載酒重過幾樹林
地遠紅塵飛不到
蕭然相對即禪心

憶昨曾陪驄馬來
高歌急管遞相催
斜陽芳草迷歸路
更把餘尊聽落梅

送劉志忠司定海訓

乍脫風塵遊海嶠
況從弟子拜儒官
鰲山鯨浪來天外
多羨平生有大觀

送人作教龍陽

薊門千里下荆門
別意鄉情共一尊
好向春風種桃李
花開正近武陵源

贈周乾詩

為愛城南草樹幽
漫攜童馬作春遊
紅塵杳杳斜陽路

却憶揚州十二樓

送許琥作教六合

昨因獻策滯秦關
又向金陵匹馬還
桃李陰陰書閣閉
春風常伴一官閒

夜觀海棠用故燒高燭照紅粧韻七首

乳燕低飛綠窻暮
開尊共惜朱顏故
文君窈窕夜當壚
百花失色如相妬

爛熳芳英夜似燒
暝烟初傍蠟痕消
光搖翠幕微風起

何處佳人舞絳綃

春色新裁蜀錦袍
看來宛轉避蘭膏
當庭欲語空凝佇
紅露滿枝明月高

仙姿冉冉嬌紅燭
妃子春酣睡未足
謫仙已去玉顏空
凭欄猶憶清平曲

萬蕊粧成華屋春
一枝微亞金尊照
世人恨欠杜陵詩
此花真得無言妙

胭脂一樹暈明紅
艷色凝香清夜同
不解人間能有此

移根元自上陽宮

繁條婀娜疊紅芳疑是佳人向晚粧
寄語東風共相惜
為留香艷伴花王

代作許壽詩

清溪一派五湖通雲影波光十里同
老人洗髓初成道
為訪當年河上公

題掃雪煎茶圖

素質漸淪浮蟹眼綠塵初淪映娥眉
一杯漱入枯腸裡

尚憶思成禪詔時

由來風味此中優
翻為羊羔錦帳羞
不如僵臥蓬廬者
自是名臣第一流

帝京歌

一自文皇破虜還
闕門天險壓秦關
候騎不窺雲中郡
屯田直至紇干山

帝座分明照冀州
妖星從此實旄頭
皇圖永似西山固
聖澤黃河萬古流

天戈漠北靜胡沙
帝里長安通狹斜
中貴多騎大宛馬
都人愛種洛陽花

滹沱易水接盧溝
千古漁陽說上流
聖王一統開華夏
佳氣常朝五鳳樓

礪峯上元燕會卷和韻

寧親歸去隔仙家
燈火長安望轉賒
社裡新詩應寂寞
天涯明月共光華

火樹凝輝玉漏遲
勝遊偏記上元時
不嫌身在蓬瀛外

綵服清觴亦自宜

余以省覲南還歲餘不復陪諸兄文字之飲比再入館礪峯出此卷索和蓋元夕燕會詩也僭附二絕用志聚散之感云

長至日寄弟口號

故鄉風土未全非
老大兒童樂事稀
尚憶雞鳴相喚起
膝前拜舞試新衣

滿路清霜逗客衣
五更初點放朝歸
才微襪線知無補

心著寒灰不共飛

節至親朋常滿堂
邀歡盡日對壺觴
不因獨坐長安邸
肯信陽回景漸長

輓錢母

狸首歌殘海樹秋
熊丸空轉夜深愁
板輿寥落安仁賦
瑤水虛無阿母遊

詞

壽談守教母六十

薰風初入幕禁城隈繚繞朱欄畫閣楊柳枝枝弱綠陰
中遙映滿堦紅藥萱花吐萼愛北堂春光如昨清晝永
人在瑤池深處安排春酌 恰有蓬瀛仙客羽服翩跹
雲車煜爚玉壺絲索玳筵前觥籌錯芳塵動正見妙舞
清歌盡日承顏為樂想萊綵潘輿茲事古今寥廓

壽陳子宣父七十

初日上珠簾乳燕雙飛垂楊風軟遊絲捲盡有鶯聲嬌
轉綠遍東城紅稀南陌偏稱人遊行花外樓臺柳邊歌

管乍開芳宴 况老景欣逢太平時滿目韶華萊衣繖
繼麻姑相訊道蓬萊水淺人生七十古來真鮮願滄海
桑田從今再變壽域無期華筵常展

壽姚申甫父

淵明未老賦歸來贏得清風兩袖田園三逕渾如舊桂
子滿中庭已擢雙枝秀 長君鸞詒喜重榮繡服光輝
清畫黃花秋晚浮新酎駟馬入高門願上千春壽

吳尚質壽母

芙蓉露滴秋江冷黃花欲滿東籬雁行歷歷海雲低想
重閨明月正屈指歸期春風初喜蘭芽茁齊眉燕婉
芳菲錦屏銀燭映仙卮年年歡此會應不羨瑤池

題來雁詞

絳闕冬初瑤階月滿仙宮恰喜新成螭碑鴻筆帝命屬
春卿石上丹書珍重許微臣並勒銜名縞衣人來從何
處恍惚夢魂驚聽齋宮漏徹家童躑躅特地傳聲有
翩翩鳴雁夜集前楹可道事都非偶皇恩重物兆先迎

自而今禁垣清切日見被光榮

又一首

沙塞風淒瀟湘雲暖橫空多少成行隨陽南去待春更
迴翔何事偏離故侶含聲戢翼下君堂堪愛是月明三
五燭影對寒光况翩翩縞服依依清夢歛達君傍道
羣分類聚二語分明那時剛承恩數宰碑書托姓名香
漸陸重看今日兆染翰待君王

顧隆吉索壽周君六十

楊柳風柔燕子斜江南春色正繁華畫樓絃管是誰家
冉冉歌聲迎落日盈盈舞影亂流霞千年重見碧桃
花

壽姑母七十詞

二月春添富貴千秋人對芳菲朱顏綠髮金尊裏笑道
古來稀柳外歌傳金縷花前舞襯斑衣瑤池宴是承
歡處此日報春暉


代壽陳鄉人

花滿江城月滿樓玉卮金縷共相酬主人華髮未盈頭
心遠不妨遊市井身閒端可做王侯人間何處是丹
丘

馮尹父母雙壽詞

喜金魚乍縮玉節更頒功名都就歸老田園松菊渾如
舊往日中元恰逢初度又小春時候天降長庚星垂寶
婺齊膺眉壽堪羨君家滿庭玉樹數枝丹桂誰論謝
竇牛刀試割百里賢聲驟片片白雲東去鄉園迢遞頻

回首綵衣遙拜兩袖清風一杯春酌



具茨詩集卷五